



## Անթոնիո Ֆելժո կը ստանձնէ Գալուստ Կիւլպէնկեան Հիմնարկութեան նախագահի պաշտօնը

3 Մայիս 2022-ին Փրոֆեսոր Անթոնիո Ֆելժո ստանձնեց Գալուստ Կիւլպէնկեան Հիմնարկութեան նախագահի պաշտօնը. ան նախագահ ընտրուեցաւ 15 Դեկտեմբեր 2021-ին տեղի ունեցած Հիմնարկութեան հոգաբարձու մարմինի լիազումար ժողովին:

Անթոնիո Ֆելժո Հիմնարկութեան հոգաբարձու մարմինի ոչ-գործադիր անդամ եղած է 2018 թուականէն ի վեր: Ան առաջին նախագահն է որ մասնագիտացած է հասարակագիտական ուսմանց մէջ. իր դոկտորականը ստացած է Պրատն համալսարանէն (Միացեալ Նահանգներ) 1985-ին, մասնագիտանալով Անգլիական եւ հիւսիսամերիկեան գրականութեան մէջ: Նոյն նիւթին շուրջ իր մագիստրոսի կոչումը ստացած է Ալպանիի Նիւ Եորքի պետական համալսարանէն (1979): Ֆելժո Լիզպոնի համալսարանի դասախօս է (Անգլիագիտութեան եւ գրականութեան տեսութեան բաժին): Նախապէս եղած է Լիզպոնի համալսարանի Արուեստի եւ Հասարակագիտութեան դպրոցի տնօրէն, շատ մը այլ վարչական բարձր պաշտօններու առընթեր: Ան անգլիական, ամերիկեան եւ փորթուկալական գրականութեան վերաբերող բազմաթիւ գիրքերու եւ յօդուածներու հեղինակ է. այլ գործերու շարքին՝ փորթուկալերէնի թարգմանած է նաեւ Շէքսպիրի եւ Օսքար Ուայլտի գործերէն:

Պաշտօնի ստանձնումի իր խօսքին մէջ Անթոնիո Ֆելժո ընդգծեց որ Գալուստ Կիւլպէնկեան Հիմնարկութիւնը «բարեգործական հաստատութիւն մըն է, որ կը մարմնաւորէ այն ժառանգութիւնը որ ձգած է Գալուստ Սարգիս Կիւլպէնկեանը՝ իր ժամանակին եւ իր դարուն եզակի մարդը. որեւէ անձ որ կը ղեկավարէ Հիմնարկութիւնը, պարտի պահպանել այդ ժառանգութեան տեսական բնոյթը»:

Նախկին նախագահ՝ Տիկին Իզապել Մոթա արժանացաւ յոտնկայս ծափահարութեան Հիմնարկութեան իր 26-ամեայ ծառայութեան համար, զայն նախագահելով վերջին հինգ տարիներուն ընթացքին: